

## **Cheeti da Pawlo sa Filimooni Gimba guri giyaada**

Cheetiti ya/abimiisay Pawlo nagaa handikimi sa hindaqaru waku gwaa /ambu Kristu daa eteediidine na Filimooni. Leẽ gu tongee da Filimooni, yaati heedi waku daa eteediidine Oneesimo. Oneesimo yaati lakidi daqa Filimoonigo, yade hiigaasooge gi heedi goó /amba Kristu tlehhidi. Slime, Oneesimo gi iliiay Pawlo kakaaru gu Gimba gu Hhou gu Yeesu, qatlay giyaa ilii khiidimooge wane. Teesaaqay, Pawlo gugi ki'isi Oneesimo daqa Filimoonige hari cheetiti, daa firinti Filimooni, ma ilamooyimi Oneesimo. Sariyaa da tawaaloo da Ruumige, Filimooni yaa kona haaki da gaasaraa tongimoo gosi hiĩ gwaa lakidu. Te'esii, Pawlo hiti ilake-saasidi sa Filimooni tuba, ina kwanda inkoo gu /ambiye tongimoo gosi Oneesimo ubee ti hhia goó /amba Kristu.

### *Cheeti da Pawlo sa Filimooni*

<sup>1</sup> Cheetiti yaa daqa dooi dahhada ana Pawlo, daa khiidimi jeerage sa kakaaru Gimba gu Hhou gu Kristu Yeesu, haa daqa hhia gooraa Timoteeyo. Sugwaani handikini ugu Filimooni dana'a goori ga sla'ane, goó yondiida sliimaa haa dandiray yondu gu Kristu. <sup>2</sup> Cehheemisi hhioo doori Afiya, Arikiipo sirikaarimoo dana'a goori

haa cehheemisi hida gu kanisaa doó hiikurunkurimida mara googuu.

<sup>3</sup> Ana firiirima ambee, hhoínay gu didiru haa qasaw goó daqa Iliitleemu dahha, Taataa goori haa daqa Looimoo gu Goõ Yeesu Kristu, ibiidiye sliimaa haa unkuray.

*Pawlo hha'aleesi Iliitleemu sa Filimooni*

<sup>4</sup> Gu lou, balalu sliimaa, qatlay ana goó ilii firime Iliitleemu sa ugu, ana sugoóti kaawa ina /iisoo. <sup>5</sup> Sa gimba ha akhaakhamisa, gimba gu /imba doogu daqa Looimoo gu Gonge Yeesu, haa sla'amuu koku daqa hida gu Iliitleemuge. <sup>6</sup> Kara ana ha firiirima sa ugu ambee, sugu hadisiye /uuru gu ilatlatlaw /imba doogu, ga konte daqa Kristuge. Ugu ma slayidi caahhamuu gwaa bu'udu, idadu gonge gu hhoi ga kone ilagaasa doorii haa Kristu. <sup>7</sup> Gu lou, sla'amuu koku sinaa qayri hha'aloo, kara hinaa muuna hii/atlisiri hari khisla, sa gimba ugu hhia goy haa muuna boo'esidi hida gu Iliitleemu, hari sla'amuu gaa laqanti daqa dooinay.

*Pawlo tlaatlaqasi Filimooni ma kwahhasuusi Oneesimo*

<sup>8</sup> Teesaaqay, ana hari/atlimaa hhanki ga koome ilagaasaraa dooi daqa Kristuge, haã aloo hi-idahasa ilakaawa ugu hari /uuru, ma yonditi gimba duguũ slaiye ugu magu yonditi. <sup>9</sup> Gimati teesaaqay see, haã arimi ambee, ti ba/ay gimbaki suguti kaawa hari muuna gu sla'amuu. Ana ti Pawlo, kwasluumuuday gu Kristu Yeesu, inkoo see khiidimooge waara sa yondu gosi. <sup>10</sup> Inkoo, ana idoo ga firime daqa dooguu na nahaã ambee,

aare laqami hhoinay googu sa Oneesimo.\* Ina daqa dooi hikee ti nankoy loi pahha, sa gimba ana nuguraa giyaadi, ma /mbi Kristu, qatlay ga ilii khiidimooge waare. <sup>11</sup> Waka'alee, qatlay ina giyaa ilii lakidi daqa doogwaa, yaa konaaba faydaa daqa dooguu. Gu lou, inkoo ina ti kona faydaa hari khisla daqa doorii gonkotaa.

<sup>12</sup> Inkoo, aare Oneesimo naykee hagwaani ki'isi taysi daqa dooguu. Gu lou, hikee ubee ti muuna goy loi pahha naa hadakay taysi daqa dooguu. <sup>13</sup> Ana haã sla'a, ina ma meeti ti'ii haa ana, mani iliiay da ugu gooay idoo hanaa iliiaydi, qatlay ga ilii jeerage waare sa kakaaru gu Gimba gu Hhou gu Yeesu. <sup>14</sup> Teesaaqay see caahhi, ana yondiidaaba gimba lensee, bere ugu haguba /mbaraa. Ana sla'aaba /uureesa ugu mani iliiaydi, teesaaqay cabuuma doogu dagati laqane hari idoo ga iliisla'ade muuna googwaa ugu loi. <sup>15</sup> Ana goo ilatahhe, hatee na idoo Oneesimo sugunaa hiideehhi daqa doogwaa slehheeri angaamaka. Inkoo, qatlay giyoo iliiki'ye taysi daqa dooguu, sliimaa wane haa ugu balalu sliimaa. <sup>16</sup> Qatlaykaa gu inkoogo, hagu hhanti kara fata ina ubee, ti tongimoo googu kilesi. Inkoo ina kona hhoinay hari khisla gu hiicataraa da tongimoo see, sa gimba ina yoó /mbi Kristu. Inkoo ina ti hhia googu ga sla'ade. Gu lou, ana hagu sla'a ina, teesaaqay see, ugu haguti asu sla'ada hari khisla, sa gimba ina ti tongimoo googu, kara hiti hhia googu daqa Looimoo gu Gonge.

---

\* **1:10** 1:10 Oneesimo: Umaki ma'aana dosi na Gu kooma faydaa.

<sup>17</sup> Teesaaqay, bere hani khu'uda ubee, ana na hhia googu yondu gu Kristuge, aare kwahhasuusi Oneesimo idoo gaã aloo ilii kwahhasuusi side gooy ana. <sup>18</sup> Bere wana gimba gu tlaku Oneesimo giyaa dakusi daqa dooguu, kara bere yaa buiiba inaa daqa dooguu, sini kaade ana haga bua. <sup>19</sup> Gimbaki ana Pawlo nugwaani handikimi hari daba goy loi ambee, ana iinatee haga bua goõ sa ugu. Teesaaqay see, slayii tuba, ugu konta inaa daqa dooii, da ibinatee da /abi ga konte muuna googuu. <sup>20</sup> Inkoo ye hhia goy, aare sini yondite gimbakee gaã firimi daqa dooguu sa Kristu. Kara muunaboo/eesi muuna goy ubee, hhiee pahha daqa Kristuge. <sup>21</sup> Ana ga ilii handikiikime cheetiti, ha khua ambee, gimbaki hagu yondita, yoótii cati hikira see gaã firimi.

<sup>22</sup> Kara haguũ firimi siniharaa ilakhuukhu'uside daqa, te'esii mara googuu. Gu lou, ana kooma iliipa'aru ambee, Iiitleemu sangwaa ilaki/isi unkuray, idoo gaa ilii frintiri gooy daqa dosii, ana ma dinaay ca/asi jeerago, nangwaa arimaa kay unkuray taysi karaai.

### *Cehheemisuu guyii faakoo*

<sup>23</sup> Hhia Filimooni, dugwaani cehheemisi ha Epaafura dana'a goy, gu waara haa ana ti'ii jeerage sa yondu gu Kristu Yeesu. <sup>24</sup> Kara dugwaani cehheemisi ha Maariko, Arisitaako, Deema haa Luuka, yondimiisee dene'ee koi.

<sup>25</sup> Inkoo firoo doyi na nahaã ambee, hhoinay gu didiru gu Looimoo goori gu Goõ Yeesu Kristu ibiidiyee haa unkuray gonkokunaa.

**Ilaʼimbidu Gu /abu hari Burungaisoo  
Burunge: Ilaʼimbidu Gu /abu hari Burungaisoo  
(Bible)**

copyright © 2019 Wycliffe Bible Translators, Inc.

Language: Burunge

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 21 Feb 2024 from source  
files dated 29 Jan 2022

5fd9f69c-03b6-5343-85b8-5043bec70185